



სდასუ

შპს საქართველოს დავით აღმაშენებლის სახელობის უნივერსიტეტი

მედიცინისა და სტომატოლოგიის სკოლის საბჭოს დებულება

მუხლი 1. მედიცინისა და სტომატოლოგიის სკოლის სტატუსი

- 1.1 შპს საქართველოს დავით აღმაშენებლის სახელობის უნივერსიტეტის (შემდგომში „სდასუ“) მედიცინისა და სტომატოლოგიის სკოლა (შემდგომში „სკოლა“) წარმოადგენს სდასუ-ს საგანმანათლებლო სტრუქტურულ ერთეულს, რომელიც აკადემიური თავისუფლებისა და ინსტიტუციური ავტონომიის პირობებში განხორციელებული ერთსაფეხურიანი და სადოქტორო საგანმანათლებლო პროგრამების, ამასთან დიპლომშემდგომი განათლების (პროფესიული მზადების) - რეზიდენტურის, მეშვეობით უზრუნველყოფს მედიცინისა და სტომატოლოგიის დარგში თანამედროვე მოთხოვნების შესატყვისი კომპეტენციის მქონე, შიდა და საგარეო შრომის ბაზარზე კონკურენტუნარიანი მედიკოსების, სამეცნიერო და აკადემიური კადრის მომზადებას დიპლომირებული მედიკოსის, დიპლომირებული სტომატოლოგის და მედიცინის დოქტორის აკადემიური ხარისხის მინიჭებით;
- 1.2 სკოლა საქმიანობას ახორციელებს აკადემიური ავტონომიურობის პრინციპზე დაყრდნობით და ანგარიშვალდებულა სდასუ-ს დამფუძნებელთა, რექტორისა და აკადემიური საბჭოს წინაშე;
- 1.3 სკოლა მოქმედებს საქართველოს კონსტიტუციის, უმაღლესი განათლების ევროპულ სივრცეში მარეგულირებელი საერთაშორისო ხელშეკრულებების, შეთანხმებების, დეკლარაციებისა და კონვენციების, აგრეთვე „უმაღლესი განათლების შესახებ“ საქართველოს კანონის, სდასუ-ს დებულებისა და წინამდებარე დებულების საფუძველზე;
- 1.4 სკოლა არ არის იურიდიული პირი;
- 1.5 სკოლას აქვს საკუთარი ბეჭედი;
- 1.6 სკოლის იურიდიული მისამართი და ადგილსამყოფელია: ქ.თბილისი, ილია ჭავჭავაძის გამზ. N 25.

მუხლი 2. მედიცინისა და სტომატოლოგიის სკოლის საბჭო

- 2.1 სდასუ-ს მედიცინისა და სტომატოლოგიის სკოლის საბჭო (შემდგომში „სკოლის საბჭო“) სდასუ-ს ძირითადი საგანმანათლებლო და სტრუქტურული ერთეულის, მედიცინისა და სტომატოლოგიის სკოლის წარმომადგენლობითი ორგანოა, რომელიც განხორციელებს სკოლის საერთო მართვას;
- 2.2 სკოლის საბჭო მოქმედებს საქართველოს კანონმდებლობის, უმაღლესი განათლების ევროპული სივრცის მარეგულირებელი საერთაშორისო ხელშეკრულებების, სდასუ-ს დებულებისა და წინამდებარე დებულების საფუძველზე.

მუხლი 3. მედიცინისა და სტომატოლოგიის სკოლის საბჭოს ძირითადი მიზნები

- 3.1 სკოლის საბჭოს ძირითადი მიზნებია:
 - ა) სკოლის მუშაობის ოპტიმიზაციის გზების დასახვა;
 - ბ) შრომის ბაზარზე ორიენტირებული, თანამედროვე საგანმანათლებლო პროგრამების შემუშავება;
 - გ) სამეცნიერო - კვლევითი მიმართულებების განსაზღვრა;
 - დ) ინტერნაციონალიზაციის ხელშეწყობა;
 - ე) დიპლომისშემდგომი განათლების (პროფესიული მზადების) სარეზიდენტო პროგრამების დაგეგმვა;
 - ვ) ეროვნულ და საერთაშორისო სასწავლო და სამეცნიერო-კვლევით ცენტრებთან ერთობლივი სამეცნიერო-კვლევითი პროექტების დაგეგმვა;
 - ზ) მედიცინის/სტომატოლოგიის დარგის განვითარების მიზნით ჯანსაღი ცხოვრების წესის პროპაგანდა, დაავადებათა პროფილაქტიკის, დიაგნოსტიკისა და მკურნალობის თანამედროვე მეთოდების რეალიზაციის ხელშეწყობა;
 - თ) მაღალკვალიფიციური პერსონალის მოზიდვის მექანიზმების შემუშავება;

მუხლი 4. მედიცინისა და სტომატოლოგიის სკოლის საბჭოს ამოცანები

4.1 სკოლის საბჭოს ამოცანებია:

- ა) სამეცნიერო - კვლევების დაგეგმვა და განხორციელების ხელშეწყობა;
- ბ) ქართულ და უცხოურენოვანი პროგრამების დაგეგმვა;
- გ) სასწავლო და სამეცნიერო - კვლევით ცენტრებთან მემორანდუმების გაფორმება;
- დ) მედიცინის საგანმანათლებლო პროგრამის საერთაშორისო აკრედიტაციისათვის საჭირო ღონისძიებების დასახვა;
- ე) პლაგიატის აღმოჩენის, მისი პრევენციის, შემთხვევებზე რეაგირების მექანიზმების განხორციელება;
- ვ) ჯანდაცვითი, გარემოსდაცვითი, სოციალური აქტივობების დაგეგმვა საზოგადოების განვითარებისა და ცოდნის გაზიარების მიზნით;
- ე) სკოლის ცნობადობის გაზრდისათვის საჭირო ღონისძიებების დაგეგმვა

მუხლი 5. მედიცინისა და სტომატოლოგიის სკოლის საბჭოს შემადგენლობა

5.1 სკოლის საბჭოს შემადგენლობაში შედის მედიცინისა და სტომატოლოგიის სკოლის აკადემიური პერსონალის ყველა წევრი და სტუდენტთა თვითმმართველობის ორგანოს მიერ არჩეული წარმომადგენლები, რომელთა რაოდენობა შეადგენს სკოლის აკადემიური პერსონალის ერთ მეოთხედს. იმ შემთხვევაში, თუ აკადემიური პერსონალის რიცხვი 4-ის ჯერადი არ არის, სკოლის საბჭოში სტუდენტთა თვითმმართველობის წარმომადგენელთა რაოდენობის განსაზღვრისას დამრგვალება მოხდება სტუდენტების სასარგებლოდ.

5.2 სკოლის აკადემიური პერსონალის წევრად ითვლება სდასუ-ს მედიცინისა და სტომატოლოგიის სკოლის აკადემიურ თანამდებობაზე დასაქმებული პირი.

5.3 სკოლის საბჭოში სტუდენტთა თვითმმართველობის წარმომადგენლების არჩევის წესი განისაზღვრება სდასუ-ს სტუდენტური თვითმმართველობის დებულებით.

მუხლი 6. მედიცინისა და სტომატოლოგიის სკოლის საბჭოს უფლებამოსილება

6.1 სკოლის საბჭო:

- ა) განსაზღვრავს მედიცინისა და სტომატოლოგიის სკოლის საქმიანობის ძირითად მიზნებს, მიმდინარე ამოცანებსა და საქმიანობის პრიორიტეტებს;
- ბ) შეიმუშავებს წინადადებებს სკოლის აუცილებელ ხარჯებთან დაკავშირებით და წარუდგენს სდასუ-ს რექტორს;
- გ) დეკანის წარდგინებით შეიმუშავებს და სდასუ-ს აკადემიურ საბჭოს დასამტკიცებლად წარუდგენს სკოლის განვითარების სტრატეგიულ და სამოქმედო გეგმას, საგანმანათლებლო პროგრამებს და სამეცნიერო-კვლევით პროექტებს;
- დ) დეკანის წარდგინებით შეიმუშავებს მედიცინისა და სტომატოლოგიის სკოლის სტრუქტურასა და დებულებას და დასამტკიცებლად წარუდგენს სდასუ-ს აკადემიურ საბჭოს;
- ე) დეკანის წარდგინებით შეიმუშავებს სკოლის საბჭოს, სადისერტაციო საბჭოსა და დოქტორანტურის დებულებებს და დასამტკიცებლად წარუდგენს აკადემიურ საბჭოს;
- ვ) დეკანის წარდგინებით სკოლის აკადემიური პერსონალიდან ღია კენჭისყრით ირჩევს სკოლის საბჭოს მდივანს;
- ზ) ისმენს დეკანის ანგარიშს გაწეული მუშაობის შესახებ, არაუგვიანეს ერთი თვისა ახალი სასწავლო წლის დაწყებიდან, ან საჭიროებისამებრ, ნებისმიერ დროს, სკოლის საბჭოს წევრთა სიითი შემადგენლობის არანაკლებ 1/2-ის მოთხოვნით;
- თ) აკადემიურ საბჭოს წარუდგენს ცნობილ საზოგადო მოღვაწეს ან აღიარებულ მეცნიერს სდასუ-ს საპატიო დოქტორის წოდების მისანიჭებლად.

6.2 სკოლის საბჭო ახორციელებს „უმაღლესი განათლების შესახებ“ საქართველოს კანონით, საქართველოს კანონმდებლობით და სდასუ-ს დებულებით მისთვის მინიჭებულ სხვა

უფლებამოსილებებს.

მუხლი 7. მედიცინისა და სტომატოლოგიის სკოლის საბჭოს მდივანი

7.1 სკოლის საბჭოს მდივანი, რომლის არჩევა ხდება სკოლის საბჭოს პირველ სხდომაზე, ახორციელებს საბჭოს მიერ გაწეული საქმიანობის ორგანიზაციულ უზრუნველყოფას და საქმისწარმოებას.

7.2 სკოლის საბჭოს მდივანი:

- ა) უზრუნველყოფს სკოლის საბჭოს სახელზე შემოსული წერილებისა და დოკუმენტების აღრიცხვა-შენახვას;
- ბ) ამზადებს წერილებს და საბჭოს სხდომაზე განსახილველი საკითხების პროექტებს;
- გ) ამზადებს სკოლის საბჭოს სხდომებს;
- დ) უზრუნველყოფს დოკუმენტების გამრავლებას;
- ე) აწარმოებს სკოლის საბჭოს არქივს.

მუხლი 8. მედიცინისა და სტომატოლოგიის სკოლის საბჭოს წევრის უფლებამოსილების შეწყვეტა

8.1 სკოლის საბჭოს წევრს უფლებამოსილება შეუწყდება:

- ა) სდასუ-ს აკადემიური თანამდებობიდან გათავისუფლების ან სტუდენტის სტატუსის შეწყვეტისას;
- ბ) სასამართლოს მიერ ქმედუუნაროდ, უგზო-უკვლოდ დაკარგულად ან გარდაცვლილად ცნობის შემთხვევაში;
- გ) მის მიმართ სასამართლოს მიერ გამოტანილი გამამტყუნებელი განაჩენის კანონიერ ძალაში შესვლის შედეგად.

8.2 სკოლის საბჭოში სტუდენტთა თვითმმართველობის წარმომადგენლის უფლებამოსილების ვადამდე შეწყვეტის შემთხვევაში, სკოლის საბჭოს წევრი ხდება ის სტუდენტი, რომელმაც არჩევნებში უფლებამოსილება შეწყვეტილი წევრის შემდეგ ხმების უმეტესი რაოდენობა მოაგროვა. ასეთის არარსებობის შემთხვევაში, სტუდენტური თვითმმართველობა აირჩევს ახალ წარმომადგენელს უფლებამოსილების შეწყვეტიდან არაუგვიანეს ერთი თვის ვადაში.

მუხლი 9. მედიცინისა და სტომატოლოგიის სკოლის საბჭოს წევრის უფლებამოსილების შეჩერება

9.1 სკოლის საბჭოს წევრს უფლებამოსილება შეუჩერდება:

- ა) ერთ თვეზე მეტი ხნით სასწავლო ან სამეცნიერო მივლინებაში ყოფნისას;
- ბ) ერთ თვეზე მეტი ხნით ავადმყოფობის ან შვებულებაში გასვლის შემთხვევაში;
- გ) სხვა გარემოების არსებობისას, რაც შეუძლებელს ხდის მის მონაწილეობას საბჭოს სხდომებში.

9.2 სკოლის საბჭოს წევრის უფლებამოსილების შეჩერების თაობაზე გადაწყვეტილებას იღებს სკოლის საბჭო ღია კენჭისყრით, სხდომაზე დამსწრეთა უმრავლესობით.

მუხლი 10. მედიცინისა და სტომატოლოგიის სკოლის საბჭოს სხდომების ჩატარებისა და გადაწყვეტილების მიღების წესი

10.1 სკოლის საბჭოს პირველი სხდომა იმართება სკოლის აკადემიური პერსონალის ახალი შემადგენლობისა და სტუდენტური წარმომადგენლების არჩევიდან არაუგვიანეს 14 სამუშაო დღისა.

10.2 სკოლის საბჭო პირველ სხდომაზე ცნობს თავის უფლებამოსილებას და ირჩევს მდივანს.

10.3 სკოლის საბჭოს სხდომები ტარდება საჭიროებისამებრ, მაგრამ არანაკლებ სამ თვეში ერთხელ.

10.4 სკოლის საბჭოს სხდომებს თავმჯდომარეობს სკოლის დეკანი (მისი არყოფნის შემთხვევაში – საბჭოს ერთ-ერთი წევრი სკოლის დეკანის წინასწარი გადაწყვეტილებით).

10.5¹ სხვა, დაინტერესებულ პირებს უფლება აქვს დაესწროს სკოლის საბჭოს სხდომებს სათათბირო ხმის უფლებით.

10.5² სხვა, დაინტერესებულ პირთა მხრიდან სკოლის საბჭოს სხდომაზე დასწრების სურვილის შემთხვევაში, მათი დაშვების თაობაზე გადაწყვეტილებას იღებს სკოლის საბჭო.

10.6 სკოლის საჭოს სხდომა გადაწყვეტილებუნარიანია, თუ მასში მონაწილეობს სკოლის საბჭოს წევრთა სიითი შემადგენლობის უმრავლესობა.

10.7 სკოლის საბჭოს გადაწყვეტილებები მიიღება სხდომაზე დამსწრეთა უმრავლესობით.

10.8 სკოლის საბჭოს წევრის უფლებამოსილების შეჩერების შემთხვევაში ამ მუხლის მე-10.6 და მე 10.9 პუნქტებით გათვალისწინებული ხმების რაოდენობა იანგარიშება სკოლის საბჭოს სიით შემადგენლობას გამოკლებული იმ წევრთა რიცხვი, რომელთაც შეჩერებული აქვთ უფლებამოსილება.

10.10 სკოლის საბჭოს სხდომაზე კენჭისყრა არის ღია, გარდა განსაკუთრებული შემთხვევებისა. ფარული კენჭისყრის ჩატარების საკითხს წინასწარ წყვეტს დეკანი.

მუხლი 11. მედიცინისა და სტომატოლოგიის სკოლის საბჭოს სხდომის ოქმი

11.1 სკოლის საბჭოს წევრთა შეკრებისა და სხდომის ჩატარების, აგრეთვე გადაწყვეტილების მიღების ფაქტზე დგება სხდომის ოქმი, რომელსაც ხელს აწერს სკოლის დეკანი (მისი არყოფნის შემთხვევაში – საბჭოს ერთ-ერთი წევრი სკოლის დეკანის წინასწარი გადაწყვეტილებით) და სკოლის საბჭოს მდივანი.

11.2 სკოლის საბჭოს სხდომების ოქმები ინახება სკოლის დეკანის მიერ არანაკლებ 3 წლის განმავლობაში, რის შემდეგ გადაეცემა სდასუ-ს არქივს.

მუხლი 12. მედიცინისა და სტომატოლოგიის სკოლის საბჭოს დებულების შემუშავება და ძალაში შესვლა

12.1 სკოლის საბჭოს დებულება დეკანის წარდგინებით შემუშავდება სკოლის საბჭოს მიერ და წარედგინება აკადემიურ საბჭოს დასამტკიცებლად;

12.2 სკოლის საბჭოს დებულება ძალაში შედის სდასუ-ს აკადემიური საბჭოს მიერ დამტკიცებისთანვე, რაც დადასტურდება სდასუ-ს რექტორის ხელმოწერით და მოქმედებს აკადემიური საბჭოს მიერ განსაზღვრული დღიდან;

12.3 სკოლის საბჭოს წინამდებარე დებულების ამოქმედების დღიდან ყოველგვარი ცვლილება-დამატება ძალაში შევა სკოლის საბჭოს მიერ დეკანის წარდგინებით შემუშავებული ცვლილება-დამატებების პროექტის აკადემიური საბჭოს მიერ დამტკიცებისა და რექტორის ხელმოწერისთანავე.